

---

畏  
廬  
詩  
存

林  
紓  
著

自序

余恆謂詩人多恃人而不自恃不得宰相之寵則發已牢騷  
莫用俗父之錢則憾人鄙嗇迹其用心直以詩爲市耳乃絕  
意不爲詩三十以後李畬曾佛客兄弟立支社集同人詠史  
社稿以周辛仲爲冠然皆含悲涼激楚之音余私以爲不祥  
已而辛仲卒畬曾兄弟遠宦社事遂寢余亦客京師不爲詩  
近三十年辛亥春羅揆東集同人爲詩社社集必選名勝之  
地每集必請余作畫衆係以詩於是復稍稍爲之是歲九月  
革命軍起

皇帝讓政聞聞見見均弗適於余心因觸事成詩十年來每  
下愈況不知所窮蓋非亡國不止而余詩之悲涼激楚乃甚  
畏廬詩存

于三十之時然幸無希寵宰相責難僭父之作惟所戀戀者  
故君耳集中詩多謁陵之作譏者以余效顰顧怪近於  
好名嗚呼何不諒余心之甚也顧怪謁陵之後遂不許第二  
人爲之顧怪不足道譬如欲學孔孟者亦將以好名斥之邪  
天下果畏人言而不敢循綱常之轍是忘己也故余自遂己  
志自爲己詩不存必傳之心不求助傳之序至于分唐界宋  
必謂余發源於何家瓣香於某氏均一笑置之此集畏廬之  
詩也愛者聽其留惡者任其毀必如康乾之間寄託漁洋歸  
愚兩先生門下助其聲光余不屑也

壬戌十月閩縣林紆識于宣南煙雲樓

畏廬詩存卷上

閩縣林 紆琴南

歲暮邯鄲道中

人間那得九還丹往事黃梁足笑姍行客仍然夢富貴先生  
今日過邯鄲雪光一白連荒裔鴉點紛來赴暮寒聞道過江  
山色好道中未計歲將闌

題畫

一亭高立俯羣山路轉蒼巖待幾灣清曉玉童掃紅葉偶吹  
餘片落人間

自寫富春釣臺

打槳桐江看客星四更趁月過煙汀此中猶道先生在才入

酒便醒

畫竹自題

聳下貂蟬半苦飢一逢朱邸卽低眉先生種竹年年活儘有  
山厨得筍時

溫侍御毅夫集同人訪松慈仁寺

蘭若已隨兵劫換山門故物見金松却懷前迹尋殘碣不覺  
深談過晚鐘社集若關天隱相勝流何望世優容暫拋身外  
無窮感聊養僧窗半日慵

喜晤鄭蘇龕同年感賦

朝士爭如夾漈奇中年踪跡惜分馳京華述舊纔知老江上  
營樓早感時進說羣公徒一諾迴頭世難各安之袖中好檢

清哀筆留作西臺弔古詩

近寒食偶成

歲歲長安見柳芽已交寒食尙無花  
兒孫長自他鄉慣未必清明便憶家

展亡室劉孺人遺像令璐琮璈三兒朝拜三子均側室  
楊氏出也孺人所出但有珪兒今亦出宰保定矣書  
示璐子

當年若母長貧死畫裏仍然未展眉  
生壙早營吾少慰外家垂替鬼焉知  
客中設奠甯死饗身後稱賢枉有詩  
但祝阿兄多惠政焚黃親到北山時

孺人墓在北山白鶴龕

壽丁和軒

梅花影裏雪彌天知爾江樓正醉眠玩世甯無三宿戀隨緣  
但取一身便偏從溷俗存幽賞竟以觀空得永年歲歲東坡  
生日日祝君長作地行仙

辛亥三月十五日雨中冒鶴亭集同人於夕照寺爲巢

民先生作生日雨止出遊馮益都萬柳堂歸途經有

明督師袁元素墓下作

如皋先生禮陽羨年年定惠

如皋大寺

齋中元今朝稍復仿此例

主人乃卽如皋孫萬歷辛亥公生日三百年所俄朝昏老鶴  
通瞻得祖研直從水繪探詩源壞堂咫尺說萬柳稽撫前事  
鬚眉軒野雲消歇益都襲彼此攘奪如爭墩雨餘躡屐趨廊  
廡倡條四五低頽垣積陰聯畝矗孤塔野水數曲環窮村迴

思三月湘中閣垂垂萬縷搖春暄當時簪紱重遺老龔陳沈  
趙恆臨存先生抑抑念勝國三十以後潛田園朱明標季政  
顛倒長城先壞熊與袁梟輓東莞尤蛆酷引妖就瞑成艱屯  
斷墳殘碣邇夕照同龕祀台招忠魂禮成聯轡犯泥潦暝色  
咸盼城東門

陳伯潛先生招游淨業湖憩西涯彌日集者九人先生

囑余作圖紀之

春寒草未茸春盡氣猶蕭蕭寺面塘水流潤上叢木陂田抵  
阜盡柳勢因隄曲雖無瀟湘心頗有鏡湖淥西涯吾兩至物  
候歷荷菊瀏覽初若忘沈吟忽有觸梧門近莫接况乃溯懷  
麓滄趣風素高舉世禮耆宿茲鄉吾所愛掇拾入橫幅



四月十四日同陳弢庵石遺高穎生遊翠微山薄暮至

龍王堂廡下坐月

積陰鎖庭除不納門外雲暮色已潛動初疑爲游氛月光注

矢下才覺人影分長松蟠古苔老柏含微芬池魚仰泉脉下堂

有泉深潔然瀉於清池攢動撓波紋回顧池上人松氣流衫

裙靜語及道數若有山靈聞

秘魔岩見寶竹師題壁詩愴然有作

題名忽及偶齋師竟似重生再見期入口甯忘泉下痛師二於

庚子始節四孫去年同以疫死廿年猶泚壁間詩料無風概宗先輩忍對滄

桑語盛時戊戌爲余述光緒辛巳壬戌朝事甚悉早晚商量校遺草門生也感

鬢邊絲

十五日晨起大風以肩輿跨山遊獅子窩

山鳥鳴時漏陽光開門微聞草木香僧厨啜粥趣從者腰輿  
坐我猶胡床左旋右繞入深綠日黯微見雲飛揚麥田下睇  
可萬尺沿山取徑遵羊腸驀然輿幔策策動雖不顛墜仍倉  
皇生平未敢据人上卽虞娼嫉生謗傷翠微偶爾躡高頂取  
忌風伯施權強跨危涉險聽之去輿夫剽乃逾風檣闌干宛  
宛出林麓懷輿一一施丹黃沿陂雜樹亂柯幹抱山飛閣成  
橋梁盛罷得息亦佳事垂楊作態欹禪房滄趣老人感前迹  
三十年事悲衰涼風停茶罷雨亦止題名浣墨汗僧牆  
夜坐展高嘯桐亡友遺墨愴然有作

縱我生存事大難羨君一瞬付漫漫來魂偏又楓林見酸淚

寧爲宿草乾搔首漸知雙鬢改回思還味一燈寒舊情潮上  
如何遺藏却遺箋更取看

題朱古微歸鶴圖

嗜鶴非圖仙意在惜羽翰一日去乘軒道素葆則難彊村盛  
詞筆金碧輝檀欒抱鶴來吳興編竹成鶴閑綠陰岸角巾莫  
審爲朝官我道花塢佳靈芝被岩巒數里入修竹岩下多風  
蘭以此家是鶴樂且逾澗槃老友榆園翁竹屋千琅玕水軒  
飼二鶴取魚日垂竿軒敞鶴亦渺思之滋永歎所以彊村老  
萬事浮雲看無瑕寧稱瑜不瘡焉指癥但抗水雲心亦不矜  
黃冠我意終思越勝概推臨安請君籠鶴歸放之雙峰端

自題小畫二首

水雲醲處佔帆低路入南漳萬葦齊畢竟山人愛樊榭無心  
著筆亦西溪

城中簫管唱吳趨城外吟身與月俱却憶方侯爲今日扁舟  
夜半出鴛湖

九月十九日南中警報急挈姬人幼子避兵天津回視  
屋上垂楊尙凌秋作態慨然書壁

初聞南軍起頗疑智慮疏武昌固形勝瘠地難爲糈忽失十  
萬仗武庫一夕虛烽火西被蜀樓船東走吳戰聲沸漢水警  
報驚燕都達官競南逝荒悻如避胡僕嫗半散走家人聲喁  
喁我老亦舐犢安忍聽爲俘璐子年十三文筆已清腴阿喬  
亦八歲繼勒若套駒阿度方四齡盈盈玉雪膚二女尤可念

出入相抱扶焉能聚危城闔門殉老夫舍我壁間盡委我樹  
中書草草挈之行曉趁津門車回戀手植柳秋態含春姿再  
見當何時或不虞荒墟

得長沙警報

送徒初未遣胡陳燠起居然動戰塵張楚寧符三戶讖渡江  
容有八千人士心已薄曾胡業兵勢遙連武漢城破竹勢成  
無著手恐難完卵望甌閩

西開

長安朝露危挈孥居西開

西開爲英人租界

門前積潦明晝夕惟風

埃夜歸苦微茫躡步循水隈高窗黯殘燭繚垣森枯槐每訝  
非故里到門屢徘徊諸兒臥縱橫燈影明絳顙而翁苦喪亂

萬念爲之灰安能語孺穉晨興已喧阗西兵曉過門風高畫  
角哀託身若異域一夕數疑猜昨傳陷金陵礮轟雨花台羣  
公已束手坐待南軍來

聞福州兵變悽然有作

警報劈空來留後推孫恩吾鄉素窮敝遭亂寧幸存旗防久  
如丐蜷伏城東門慵窺仰餉糈象養成童昏種族辨旣嚴夷  
戮安忍言昔在康熙初鰲拜翻乾坤捕奴廣連坐漢產聲爲  
吞旗汛人踪絕草長如荒園同光稍雜處衡宇通寒暄一唱  
革命軍隣誼安復敦流血波都市縱礮頽城垣所惜無辜民  
蹂躪誰見援商疲寡便家災酷無完村一旦罹兵革挈孥恣  
崩奔吾家居蒼洲流水環楹軒亡弟遺二女長者已許婚未

能取之來懸盼心如剗長夜坐不眠瞬息升朝暾

辛亥九月二十七日余六十初度仍居西開賦此自嘲  
吾年五十客杭州甲子于今已一周兩度逢辛皆遇亂舉家  
爲壽若忘憂不才無可編生傳多難居然及白頭滿眼烽煙  
腰脚健尙堪秋望屢登樓

入都至故宅

憶從辛丑來孔道蟠羣狼百夫競行李千錢負一囊端門集

外兵曹署空諸郎所賴京尹賢

陳玉蒼尙書方爲京尹爲余購家具儲米炭盛意至今耿

然爲余安琴裝匆匆十一年戎馬復蒼黃避地豈長策感時  
思舊創稍歸挈殘書風物逾荒涼野水漸成冰林葉新耀霜  
道少衣冠人翻疑非帝鄉戚屬遷徙盡空宅留斜陽吾軒竟

月閉凝塵黯東房家具擲零星觸目皆愴傷惟餘小黃耳戀  
主神飛揚投肉與汝別明日仍殊方

辛亥十月十六日感事

宗輔初將責地承臣民洗眼望中興忽傳璽綬收昌邑從此  
危疑甚竟陵儘有人將時政議從無才足國屯勝 景皇志  
事終難就可亦迴思戊戌曾

不眠

不眠中夜起無計振時艱冰氣寒逾雪樓峯暗似山琴書屏  
人外天地在兵間累月儘無事吾心未覺閒

辛亥除夕

尺壤仍留祖臘名舉家循例坐平明江南已是花朝後

爲本  
新



歷二月  
十七日

直北纔聞竹爆聲安計明年何善策且憑杯酒慰勞  
生風光那與興亡事依舊春來日日晴

辛亥除夕得石遺書却寄

累聚景常忽暫離味彌長石遺去秀野桃柳荒深堂柴車三  
過門伏軾思琴觴比聞生壙成屏衛多松篁清江面千帆明  
滅如瀟湘作達已非易知足寧可量恆人昧素退臨老忘深  
藏譁衆妄取寵疵累滋堪傷吾子矢狷介豈惟能文章卽不  
遘喪亂歸耕亦有鄉庭梅况已開幽香拂琴牀萬綠閱柴關  
款關唯何郎梅生勝侶日夕合搖搖燈燭光酒半時念我風前  
書數行跡睽道則同南北遙相望

壬子正月十二日入都同劉資穎及高甥稔飲于小有

天三層樓上某將軍所部兵潰縱火攻剽火發可十  
二處樓高鐵欄固益以鐵扉賊止弗攻飛彈流空厥  
聲達曉余亦幾瀕于險

酒人聞變杯齊覆樓下礮聲過爆竹十夫力鎖鐵闌干火光  
已射闌干角閉窗滅燭颯微隙噤聲如啞奴厮伏武冠數猛  
聚樓下鎗刃力與鐵扉觸再攻不克舍我去月中移影犯鄰  
屋居人爭效猢猻蹲叛軍直作老熊撲燭光暗處影塞扉劍  
聲鏘然刃破櫝萬聲雜動呼開門掠索旋過舍五六斗然鎗  
止不聞聲趣行頗似鬼相逐人人握刃手巨火非燈非炬燄  
深綠僅半炊許光絳天棟摧瓦覆觚棱燭城中火聚十二屯  
前後驚盼罷吾目對門一卒挾火入心知禍至氣爲促昊天

似憫一樓人幸非縱火但冥索更沉鼓寂月如水駝卒沿街  
拾珠玉得大遺小賊弗校屑屑轉爲細民福平明樓下見行  
人賊亦雜行果其腹汝曹一夕恣捆載吾民百室空儲蓄大  
帥充耳若弗聞擁賊作衛謬鈴束利熏心癢那卽已都門行  
見一路哭

十四夜天津果大掠

月光微暗樓窗紅火發河北明河東哭聲震天不到耳是夕  
正起西南風西人嚴兵阨孔道咫尺音問無由通遲明出觀  
但煨燼翁啼嫗啼途路中刀痕著扉板都碎窗扇委地樓全  
空微聞叛卒但四十以利嘯結羣愚蒙巡社衛兵首從逆挺  
械爭出聲洶洶曹伏思亂固已宿響應乃類撞洪鐘熱賊人

人囊橐豐細民尾逐療飢窮巡衛匿賊易衣出反以逐捕矜  
奇功北門駢戮百有二真賊不與仍從容賊曹屏息無敢指  
轉與獎犒求調融縱兵爲盜旣失計宜罪反賞誰從公南軍  
卽至亦奚補主客疑駭將凶終政府趣立憲法定南北連合  
平內訌瓜分豆剖禍或戢老夫旦夕祈蒼穹

珪子宰大城城中無兵時旁邑爲叛軍焚掠且盡一日  
有百餘賊臨城珪子出城問狀兵謬言奉檄來衛珪  
子知其謬用羊酒米麵犒之慰以溫言遣去城得完  
作此寄示珪子

在昔元使君綰符守道州西賊破永邵旁縣苦虔劉作詩示  
官吏深爲窮黎憂餘生脫賊吻未忍加徵求汝今宰小邑敢

與前賢侔所仗運命佳竟使民病瘳去縣三十里賊火焚任  
邱扇擾及大城意亦在窮搜汝能止豪暴臨難生權謀苦語  
述貧瘠哀痛回賊酋縣中出羊酒境外傳歌謳此語聞若翁  
喜極翻淚流吾家素貧罄未有良田疇我老自食力饘粥奚  
汝籌蘇民一日困愈汝三生修哀哀此蒼赤遺產賊所留幸  
勿矜嚴細但願加慈柔比聞下閣令肆赦羣拘囚啓柙出餒  
虎破檻縱癘牛內饗台外訂備預方煩稠爲爾慮眠食日吁  
或未休果能爲民勞或不貽我羞所當布精誠猾豎焉得售  
寄汝春陵行守官庶無尤

由京至天津火車中偶成時眷口仍居天津也

夾隄榆柳過如飛何日勞生暫息機羃羃暑雲蒸益遠冥冥

高鳥去安之一身只作行舟看十口追懷避難時老我客中  
仍作客誤他兒女盼歸期

陳弢庵招遊西苑

恍登靈境幻仙真未著京華半點塵柳暗不分宮額字蓮深  
略辨畫船人尙傳遊讌春無限轉眼興亡迹已陳剩有授經  
君實在風光冷對苦吟身

書感

此心望治幾曾灰時變紛乘膽欲摧橫議直非常理測邊氛  
誰引切身災國先難問遑言黨心果能公轉勝才錮疾日深  
醫又誤唐衢淚眼向誰開

園居曉起

夜來涼雨漬槐心破曉微微冷意侵濕綠愈醲秋不覺小窗  
增上一重陰

題畫二首

小假僧寮滌客襟理安雨過竹房深到門怪道秋衫薄做得  
新涼是綠陰  
危棧黏天路不分鞭絲帽影印斜曛半程微覺驢鞍濕記犯  
山腰一陣雲

康南海書來索畫萬木草堂圖卽題其上

海東堂較瀼西穩投老孤臣此息機歷歷忠言今日驗滔滔  
禍水發端微荒台何地招朱鳥並轡當年想白衣萬木蕭森  
秋又暮飛鴻誰盼我公歸

嚴幾道六十壽作此奉祝

盛年苦相左晚歲荷推致又復偪喪亂相對坐惋喟長安多  
少年嘯引侈徒類沿流漸東靡伐異日西懟尊疑屏杜塞講  
學取宏邃理新不醺源述舊務訂墜落落成孤行信信起衆  
許舉旛太學沸脅羯焉得遂深深瘡塹堂風簾下松翠鮮肥  
日仍供神觀老逾粹著書布天下名理淡肝胃何用修羅掌  
揚杵震羣魅所願親醇醪君我同一醉

次黃墨園韻送步溪南歸

乾坤收拾誰擔擔羣雄奄忽成僵蠶牙兵慄銳窟直北財力  
飛輓疲江南帥府惴縮坐無策經年撚斷鬚氈氈議郎百十  
肆譙詈以黨攻黨張雄談劉侯北來避排竿寧爲山水窮幽



探牢盆手握說口沸沮訛深爲鄉人慚廿年相見髮二色豈  
但搖落悲江潭青熒燈火偏風雪嚴更夜坐人兩三近祛兜  
診逐彭寵願望規益迎張堪侯當發憤爲鄉里勿湛六籍矜  
韜含七閩貧罄亦云極有類怨曠歌襜藍理鹺幸繼正字業  
孳孳言利非吾貪

偶成

漸說烽煙靖七州承平自謂願粗酬不期今日天還醉敢厭  
勞生老未休經亂真如溫昨夢傷時只好託春愁何年再得  
臨安住收取吳山入小樓

舊曆小除夕橘叟招余食內頒春餅卽席感賦

雙匣黃封出紫宸先生留饗尙方珍纔知明日逢除夕坐想

東朝對舊臣竟有翦燈今夜語可堪回首隔年春眼中祖臘  
分明在檢取餘懷對酒醇

人日後三日上橘叟

癸丑

模糊醉裏過人日醒後方知非故林許久離家原左計不曾  
從宦豈違心固言亂世無佳節幸就詩翁學苦吟一事却增  
勞悴感柳條又長御河陰

十一日感事

破曉千官劍佩過乾清門外樹婆婆早花欲綻長春苑餘凍  
難生太液波敢謂新儀經眼慣却撩舊事上心多此來寧爲  
蟠桃熟枉費羣仙集大羅

雪後集橘叟寓齋再疊墨園韻奉柬

鐵肩道義公其擔下筆况乃如春蠶興亡過眼語吞咽惛動  
寧止哀江南入冬再雪萬卉靡庭樹無復垂甍甍曲廊深檻  
悶燈火蒼頭走東招夜談扁舟記向螺渚過奇勝恨未龍泉  
探小雄影本舉示我俗物相嚮寧毋慙爾來世味愈穀薄冷  
如寒月沈幽潭京華遺老况垂盡命車造訪無二三冥鴻一  
去那可覓宦立甯皆七不堪先生奇迹史所罕詩筆似有元  
精含前身根器定非薄天留米老爲伽藍靈光古殿素歸仰  
願公葆嗇吟毋貪

邊事日棘聞之腐心三疊前韻呈橘叟

畏廬虞險如左擔此身蜷作三眠蠶神京伏莽不時發南人  
終竟思歸南北庭萬馬踏晨雪韃韞磔磔蝟毛毳少年執政

侈袍澤手把如意饒空談袁公健者負幹濟智局高遠誰能  
探強鄰萬矢集新政爪臣虺士宜深慙尉佗志欲王嶺海王  
戊兵且聯湘潭初時許國好頭頸責德于彼今二三菁華豫  
鄂半煨燼再經兵燹誰能堪螺江荒僻足避地水光山色相  
籠含擬欲從公賃左廡探索十子窮二藍著書欲竟未了業  
知公不笑餘生貪

癸丑上巳後三日謁 崇陵作

宮門嚴閉橫斜陽童山對闕塵昏黃燎池灰冷石曲折闌戟  
風動纓飄揚廣殿沉深閤難見珠簾髣髴垂兩廂孤臣痛哭  
拜墀下穠春觸眼如秋涼衛士見狀動愕駭衣冠頽敝寧老  
郎長身玉立張京兆

張在初都守陵者

禮成對我神沮傷光宣歷歷

數朝士盡誠竭節推髯梁梁髯貧病忍自惜泣血奔走思  
先皇釀金萬數佐方上席藥累月朝便房張公言已坐太息  
克食見饗羅甘芳且言午祭行將及乳酪脯酒供蒸羊守陵  
今已屬殘貴主祭無復來諸王地宮永闕果何日主客相對  
涕泗滂沱元舊事那可說瀛臺春煖仍垂楊

宿梁格莊

戶外頗見山山童乃無樹列柳如分畦微黃撲窗戶抵暮情  
慮肅坐待初月吐柳黑月力微蓬蓬失條縷麥香餅新成廚  
潔菜非苦旅榻不成眠欹枕數更鼓

四月六日獨遊陶然亭

風葦搖涼動小渦餘春未盡尙清和山容還作前朝綠勝集

長疑昨日過塵外避喧原不惡壁間求句定無多南中果有  
行吟地寧隱王城學老坡

珪子大城受代率諸孫南歸治田作詩送之

而翁半世落江湖未逐功名喪本圖今日汝能拋薄宦吾家  
分本是農夫事難着手多方礙人解回頭一累無旦晚裹書  
來就汝瓊河數曲狎鷗鳬

爲劉健之寫蜀石經齋圖并題長句

五季僭竊多無文吳蜀獨含文字芬江南小腆盛詞筆寧及  
蜀主窮典墳堂堂蜀相母昭裔成都琢石天下聞二孫二張  
周德貞字畫清婉如歐詢摸丹入石署廣政是時開運當甲  
辰羣經胡獨短公穀留此缺憾存成均後來田公頗好古三

經圉麗煩手民原刻仍復避唐諱天澤分尙留君臣左傳成  
但缺祥字虎世二諱縱橫陳是時知祥已僭號隔闕不與亡  
唐親田况宋臣戴天水特缺恆字尊宋真綜言蜀學冠天下  
文翁高耿皆槩人孟昶風流狎花蕊經學乃亦知梁津健之  
嗜古世所罕所得紙本渾如新文莊惠政感巴蜀口碑鐫刻  
逾貞珉歸裝只此他可想帥臣原自宜清貧作齋收貯徵我  
畫寶貴乃與璆琳珍經年不歸負諾責憐我馬牛非閒身作  
圖既竟媵長句此齋已汚元規塵

與李畬曾同年夜話感成一首

不圖再見在長安各把鬚眉仔細看述舊事同前世幻愜心  
人數晚交難稍能近酒偏防病累約尋山竟畏寒永日清閒

無計耐轉尋餘味到微官

禽言閒中心緒潮起轉不如在官有公事牽戀也

精忠柏歌爲程伯葭作

己亥庚子居杭州娥井累過垂楊幽風波一亭委荆莽高柵  
局鏹風颼颼突兀古幹見斷柏含真抗立超凡儔赭賊安識  
忠毅魄熊熊頑燄燒天遁鬼神呵守那能燼較以精鐵仍難  
倖文宣廟柏斫侯景都官從賊如虔劉枿生再宿徑數尺爭  
言西瑞歸神休精靈所埒均不死神物况爲精忠留柏堂咫  
尺孤山麓亡國莫掩衰陳羞寧若吾王報炎宋樹木託庇同  
千秋佳種寧自閩陰出稚苗不向陘山抽程侯好古世所罕  
嚴防聚燎成薪櫬載歸岳廟羅前殿逐段分體馱雙牛鐵象  
非鐵柏乃鐵恨無餘葉加媪頭

用幽明錄事斥秦檜妻王氏



自徐州看山至浦口 乙卯

心上江南日往還今朝眞箇破愁顏通宵詩思偏無月數里  
徐州早見山頽綠尙饒秋望美片雲如傲旅人閒羣喧靜後  
潮初上坐聽江聲過下關

至滬上居夢旦寓樓感懷媿室不已居十日且歸留呈  
夢旦兼懷子益

士林萬口說梧州節義文章到盡頭賢弟得名寧易事江南  
相見適殘秋眞看許掾全家樂也學東坡十日留惆悵有人  
方在使寄身雲海路悠悠

過海藏樓呈鄭蘇堪

不履京華近五秋居然身世是梨洲老來鬚髥仍當日海內

文章僅此樓餘痛還爲天下惜先生真解死前休陸沈彈指  
無多日却幸匆匆續舊遊

喜晤濤園又言別

當年老猛今遺老海上相逢話故林流寓真成棲隱地先  
皇早鑒謁陵心艱危不死天非靳酸梗無言味轉深明日別  
公過建業霜風又向髭毛侵

下關厲樓望鍾山隱然而蘇堪故居卽在其下賦此奉

懷蘇堪卽題其集

望裏鍾山勢鬱蒼却從月下想濠堂欲尋前迹無三里別築  
高樓已十霜溪水還留曾照影櫻花久作避人香善夫儘有  
傷心語那復傷心似海藏

余每作一畫必草一絕句於其上二年以來作畫百餘  
幀而題句都不省記強憶得卅首拉雜錄之

道人種竹滿霞洲七月新涼似晚秋記得四更涼雨過居然  
披上木綿裘

閒中潑墨學清湘湘水空明楚雨涼隄下吳船方夜泊瓦燈  
漏出一絲光

暮色蒼然滿竹園晚潮剛沒釣魚磯江樓砦罷刺船反不道  
林鴉先我歸

一曲鴛湖煙雨樓僊僊飛絮滿樓頭遊人來去湖光裏但解  
釀春未解秋

一白兼天淨不埃巖扉寧爲俗流開人生冷暖真常事我自

韶年臥雪來

小幅經營仿石濤夕陽多處布帆高此間不是西台水有客  
蒼涼似謝翱

身是台江老釣家魚竿長日拂楊花收綸問我何消遣尙有  
樵青竹裏茶

十四年中過御河楊花陣陣水微波秋來滿眼傷搖落愁比  
涵元殿裏多

昔年湖上看廬山不到開先鼓櫂還收得空青入詩夢水聲  
長在枕頭間

繞屋松篁山氣寒開軒長日據床看年來縱有徵書及却自  
廻翔惜羽翰

新詞我笑張春水欲淨花香作麼生爭抵道人空色相長年  
只聽出山聲

粉本新翻戴鹿床碧雲搖曳竹間莊故居憶在蓮塘路盡日  
楊花入草堂

昆明湖水罷宸遊今日湖心許蕩舟哽咽豈堪談良獄一分  
柳色一分愁

漸近南漳景漸奇蕭蕭雲竹合蘆漪秋風徐動秋衫薄忍着  
新寒聽畫眉

老樹無聲水不煙危峰一白欲窮天任他砭骨寒威重不到  
袁安臥榻邊

蕭然失却碧芙蓉雲出山來白萬重不管人間方待雨只從

天半作奇峯

眼中風物似三吳  
傍水銀牆柳數株  
五尺瓜皮年少女  
盈盈到此納菱租

江上安居四十年  
開門逐處水蒹葭  
鮮心頭未蓄風波險  
一任蒲帆向那邊

風際簾紋水際簫  
畫船暮暮復朝朝  
紹興當日宸游地  
今屬蘇隄第幾橋

夾道松欹和尚碑  
禪房雨足棗花肥  
清鑑本醒人間夢  
偏在人間未睡時

面面溪光入武夷  
僧寮何處不宜詩  
尤宜雨細風輕際  
竹轡中間睡片時

瓦溝昨夜見微霜清曉西風拂面涼屈指已交黃菊候山房  
準備過重陽

連日秋陰欲雨時鱸魚逐隊過清漪人生得釣桐江水不着  
羊裘亦可兒

廻首瓊河五十秋當年雛髮尙盈頭柳花陣陣飄春水逃學  
偷騎老牝牛

破寂惟聞兩部蛙四圍純綠竹交加飯餘投食小池上突見  
金魚穿藕花

木落山空入暮秋秋聲莫撼最高樓命宮誰似山人健坐聽  
松風到白頭

涼雲陣陣拂鞭絲谷迴煙深日上遲行近劍門吟漸苦一程

山色一程詩

碧柳紅橋盡日風輕漪倒影上簾櫳江南只願長無事留點  
春光待寓公

蓮塘有客作田居臨水垂楊畫不如五尺山僮無箇事長年  
走東借人書

長松落翠蔭山家清曉溪雲薄似紗遙想故園春半後輕煙  
焙出女兒茶

丙辰清明四謁 崇陵禮成誌悲

黃霧潛消日向晨薄寒淒斷謁 陵人殘年自分無餘望巨  
變都疑有夙因聊藉清明伸一慟幸憑 靈爽鑒孤臣 先  
皇遺澤何曾歇松栝青青媚晚春



宿葵霜閣贈梁節庵

四年兩度面葵霜 陵下衣冠泣夕陽  
枯寂一身關國脉 睽離百口侍先皇  
遑從竹帛論千古 直剋心肝對五常  
眼底可憐名士盡 那分遺臭與流芳

詠史

閉戶經月心緒惡 劣無一寧日偶然  
憶及史事卽作一詩 拉雜無序盡拾而藏之  
不能名之爲詩也

孫竦媚王莽 瘡口請建儲  
吳章傳王宇 深爲衛宗虞  
處人父子間 善惡何懸殊  
宇也望幹蠱 洒洒丹楹閣  
譎諫託鬼力 妻子竟駢誅  
意本念家族 決策良非疏  
頗勝朱梁兒 剗刃爲李緒  
海宇且未定 爭立一何愚  
化家爲國難 恩信恐未孚  
奈何

作呵殿坐令人軒渠

其二

新室爵五等爲數近八百躬桓雜蒲穀寵賚無虛日蟬貂賤  
如狗邑采劃圖籍諸侯受月錢乃食庸保力漢氏豈如此常  
節敢進陟李廣躬百戰老死盼爵邑衛霍僅得侯况復屬外  
戚物稀始見貴次亦按資格區區賣餅兒位乃司空逼僉荒  
競符瑞廝養濫詔策千載仍顰效一笑生噉逆

其三

甄豐死剛強王舜死驚悸豺目張虎吻二子焉得避豐死寧  
以罪息息患立異舜也卽倖生終設亞夫戡初念助宰衡非  
必覲神器莽勢旣已張凶力生內異助逆自取病強死誰所

致就賊乞富貴終竟挾疑忌豈第爲減口勢逼寡全地不見  
胡惟庸酖死劉誠意

其四

孟堅叙劉歆不願莽居攝旣思圖富貴兼欲葆名節孰知泉  
陵侯發議震朝列謝田益崇扇左右日牙孽子駿畏劉宗臨  
議頗中懾無如羽翼成帖耳聽篡竊文人惜徒類曲筆故吞  
咽歆罪寧止此母子義先絕堂堂功顯喪去斬議麻葛天性  
固已涼何妨肆媒蝎文采甯足恃兇穢浹肌骨咄哉眼中人  
經術吾豈屑

其五

相衛政逐帥實始裴志清薛蕚旣見逐遂有貝博行承嗣利

其來洺衛大鑒兵孰知五十年見劫史憲誠何羅踵覆轍攫  
取如挈瓶自視一羌秋寇死賊復生盧龍三逐帥一姓唯溜  
青割據代封建謬言拱神京爭端既已開海宇焉得寧嗟我  
匪杜牧罪言誰復聽多恐神州土盡化朝鮮氓

其六

邦昌篡屏宋僭妄竊鐘簴博文草敕書敢作欺天語歷數侈  
有歸謳歌惜已去淮南歃血盟邦昌始怙懼持書詣濟州後  
恭失前倨孔子本尊周紀信直誑楚謬說用自圓求免齒刀  
鋸僭號固有識妖夢豈無據坐乘太上輦二馬爲之駙燕山  
受僞冊禁物恣服御二馬果如夢妖徵等劉豫入夢豈卽真  
出夢足發噓妄意覲非分終竟作公路

其七

敬冲善屬文未媿宏微孫抗節何錚錚不趣鳳莊門時議兩  
稱許二謝分陽尊梁台旣以建未嘗舍邱園溫詔除侍中無  
羨冕與軒一旦詣雲龍隱士翔九閣不肯阿齊高偏復叨梁  
恩船山論敬冲極口斥耄昏謂爲子弟偏舐犢滋愛根愛根  
日以深廉恥寧足言陷親以不義劣子真犬豚

其八

淵明與靈運晉季稱能文典午未易姓拂袖歸田園靈運遷  
衛率憤惋日上聞出爲永嘉守山水攜琴樽桃墟事一發徑  
以重辟論作詩比子房自信何斤斤淵明獨靖默蕭然事耕  
耘靈源記桃花抗懷秦人村劉宋卽秦嬴天紀爲之紛甲子

守義熙抵死心故君陶謝均名流於此妍醜分富貴直須臾  
故爲戀斜曛把酒吟陶詩頽然已微醺

端午書感

佳節偏遭亂未堪親酒杯療深悲國力惡稔構天災畫角連  
宵咽觚稜盡日埃陰風起西北回鶻趁人來

作前詩竟突有所聞悵然復成一詩

熏轅疑無已蕭然亦蓋棺吾曹得性命若輩弭兇頑列傳追  
荀傅貽謀失老瞞漸台何寂寂竟免解衣冠

段上將屏從見枉卽席賦呈

乍聞丞相徵從事果見元戎蒞草堂九詣誰譏劉尹薄一家  
未爲武安忙到門鑒我心如水謀國憐君髯漸霜雲霧江天

長寂寞何緣辨取客星光

感事

緹騎紛紜作急裝行看玉石燕崑崗吉徵早爲諸君哭大索  
仍難十日藏竟有朱家全季布幸無王允坐中郎頗聞朝議  
加甄復或不橫分及老蒼

偶成

生平自笑作詭癡海內投書謬見知文字何曾真有價乾坤  
試問此何時老來早備遺民傳分定寧爲感遇詩兩字綱常  
還認得仍將語錄課諸兒

馬來半島白李二君忽以書來詢余年書言社中人有  
謂余年三十者有謂倍者紛爭不決實則余年六十

有五矣既以書報二君作此解嘲

海外迢迢致尺箋六身二首衆疑年回頭頗惜青春遠無計

能逃白髮鮮敬儼受徵偏未仕

元史敬儼六十五請老尋徵爲學士

巫炎粗健不

求仙

神仙傳巫炎對武帝臣年六十五後得道以來乃如壯時

靜中但學安心法扇獎由他

一莞然

寄石遺福州

長安扇暑風市塵翳尋丈兒女趣園遊偶出意頗強時彥集  
若蜩聒耳故扇獎塵狀挾僮語白日接魍魎觸之輒頭痛戢  
足禁交往石遺書斗至令我發遐想明月照流水夜擊西湖  
榜雛柳纔敷陰尺葦若成蕩亭榭固非多受月頗宏敞脫衣  
去靴襪船臥至蕭爽閉目擬蹇態幻境出俯仰妬絕詩人福



羈客豈堪仿

昔我居瓊河繪春園半蕪種芋拔梅花斫竹闌鴨雛丹荔幸  
無恙盈盈絳羅襦積渴久思甘天海爲之區石遺獨飽啖口  
福誰則如方回非常奴絕技能烹魚供養萬書堆用此酬勤  
劬我但食餽飪誰復憐清癯

年來詩力堅脫手難顛撲恣爾所欲語初不患屑禿章句加  
絺繪輕若被紗縠近詩和耕樸飄然墊巾角自關功候永無  
罅足尋目海藏貽近著灑灑富篇幅雜詩尤工妙燈下恣百  
讀時時見淳蓄道貌日矜肅蕭條龍州作鬼氣出篁竹白蓮  
清夜明足爲阮亭續持以較石遺莫辨絲竹肉同譜獲二妙  
襟靈冠閩越韓孟真雲龍拭目看追逐

八月十三日愧室生辰余以酒脯祀之春覺齋三年矣

是日陳弢庵卓毅齋咸集爲禮

閨寂音塵久不歡三年空自薦杯盤尊前還信先生健地下  
應知世局難勝會雖非留影在國憂到此待誰寬蕭齋三兩  
詩流聚寧作中秋雅集看

晨起寫雪圖有感因題一詩

十年賣畫隱長安一面時賢膽卽寒世界已無清白望山人  
寫雪自家看

又一首

娘娘春風蕩柳絲湖波嬌軟晚春時記曾三過頤和苑別具  
心頭一種悲

十月廿一日

先皇帝忌辰紆齋於梁格莊清愛室五更具衣冠同梁鼎芬

毓廉至 陵下

模糊陵樹尙如春巷陌鳴雞漸向晨車馬仍隨殘月影衣冠  
竟類早朝人依依 先帝疑非分子子餘生恨不辰五度  
隆恩墀下拜失聲慟哭兩微臣

謁 陵禮成視毓清臣

廉

揮涕澆陵樹驚心捧 御筵與君合私慶何福竟瞻天白首  
酬恩晚丹心到死堅謁 陵今五度兩度對牀眠

平臺春柳圖爲詩社諸君鬪詩而作卽題其上

平臺柳色綠冥冥柳外還施九子鈴華殿流塵長日掩偏生

婀娜向人青

雪中懷石遺却寄

朔風吹雪徧金臺遙想鄉園梅已開懷舊頗傷臨老別對燈  
滿望寄詩來艱危共閱無窮事彼此還存未盡才更莫消磨  
鉛槧裏西湖端可置吟杯

周松孫下世六年矣停棺蕭寺余爲經紀其葬事飭其

子爾蘇送歸臨奠愴然賦此

不爲談詩葬善夫區區舟麥敢言無一生郎署甯論命六載  
荒庵始出都未了事惟刊剩稿萬難忍是送遺孤知君此去

無他戀定爲 崇陵淚眼枯

周君臨命之前一年曾入侍  
崇陵醫藥歸後哀痛無已

少帝頒御書煙雲供養春條紀 恩一首

畏廬詩存 卷上

琳瑯 宸翰出重城感激啣 恩涕淚橫雨露那曾偏小草  
煙雲今足養餘生從來 天語不輕錫自問布衣無此榮檢  
得同光舊衣頂望空泥首嚮乾清

喜李畬曾病起天津賦此代柬 丁巳

雪後深窗憶舉杯幽癖未必卽爲災人難百歲常常健病逐  
新春冉冉回豈藉奇方纔得驗但憑陰德早無猜  
陰用丙吉事 芳  
園不日花如織好趁輕車破曉來

宣尼

宣尼綜大道未聞闢老子至中無可偏皜皜莫尙已韓愈師  
孟軻擊掊自是起闢佛亦殊淺所爭特尺咫大顛闡微言動  
色未敢詆君子貴躬行甯以口舌市近人競教宗萬聲崇闕

里畫地局聖域吾莫測所以大道吾軀命嚮背決生死佛老  
雖雜傳附身直蝨蟻悠悠四千年聖言不爲靡小儒過幽陋  
轉以教宗擬燔柴助日月愚闇乃爾爾

過圓明園

清華水木麗圓明臺殿渺同居春氣中風日忽荒悄草根枯  
黃瓦仍見重垣繚怪石尙歷落僵柏自夭矯寒灰壞殿基愴  
惻數廻繞清漪久乾涸那復偃芟蓼 顯皇昔駐蹕千官侍  
清曉西師搗析津南寇窟江表劫火聯暢春三輔被窺擾鼎  
湖悲甫殺頤和構臺沼高樓上切雲雲端王母笑興亡亦轉  
眼遺民忍臨眺閉門如連昌永日閤風篠殘狀較勝此狐鼠  
夜騰嘯掩淚上馬行迴頭望殘照

酬夏劍丞見贈 不步原韻

眼中數詩流，映庵吾所許。極力追宛陵，步不間累黍。賞狎忽及我，驚朽竟何取。詩中論遶譯，乃述抱冰語。昔公鎮南服，廣厦覆寒窰。偶然得吾文，評隲近齟齬。生平避宰相，未敢學韓愈。卅年聲迹絕，臨奠及槐府。去歲面西華，謂其季子燕卿蕭閒行踽踽。

長安多故吏，誰復加收叙。映庵同我貧，談引或見拒。捶膺

愴國老，前頗任艱巨。元翰旣兇惇，道子亦窳腐。樑木朽一夕，

棘矜奮三楚。公固非知我，念公淚如雨。海藏類杜陵，臨老觸

嚴武，映庵尤鯁訐。

新唐書鯁訐不避宰相

黃鐘雜大呂，貶素笑到撝。恐

禍無乃魯，抗節能見容。終竟勝黃祖，君我志事同。酬詩掬肺

腑

輓李畚曾同年

老來死是尋常別冷眼觀空轉不悲得藥剛傳三日愈慰情

枉寓一箋詩遺言着意惟祠祭預兆無心及墓碑

去年君自書今年六

十壽不徵余文但乞生城一銘

爲想銘旌南下日新阡桃杏正開時

得和軒書言將自裁

絕命詩從天外來故人搵淚讀千回謀家不遂遑言國舉債  
無門豈有臺饑渴既難將我恃窮愁奚止爲君哀尺箋欲報  
詞難就臥聽西風睡眠開

題退思齋畫影

沈君集畫成畫史開卷卽見吳道子吳生雲輦貌天帝畫苑  
餘事乃剩此自唐及宋均名筆宣和御墨尤觀止景陽宮裏



軸五百蝨蟬飽飫澄心紙陳伯潛為余言景道君長卷仍幸

存筠從州上人長已髯松細筆貌毛君蘆花十頃斜陽紫君道

放檣約二丈餘中有仿漢毛延壽畫老松枯其半身一黃衣人

景江靜其闕圖雅格清峭理致深遠試作小人間竟得蹙塵眼螺

江太保取 詔旨梅花道人更奇警玄宰長江寫萬里以諸軸上

皆伯潛假從景陽宮者吳仲圭二長卷精妙無倫而香光之

長江萬里圖墨氣尤非近人所能夢見周臣亦有長江萬里

假得者同時飽觀竟日未臨摹胡敢蠅頭書紙尾甯似塞翁簡

遺逸真本丹黃恣描擬伯幾真蹟最珍異林巒秀出涵烟水

塞翁言此幀最貴余觀其輪廓似閱立本貞居別字亦伯雨

然閱畫參以粉緒實為余生平不經見者 貞居別字亦伯雨

收藏不後英光米黃君號與貞居同賞鑒名家差可擬塞翁此

幀假自伯雨黃君初未謀面然元之張居貞亦號伯假君紙

雨藏畫多倪雲林時主其家古今人之固有相類者矣

假君紙

本恣君臨細妓突過龍眠李嗟余簡率無可道四聖源難探  
祖禰吳生搨本果見陽問津或可從此始

春日齋居 丁巳

燕子飛飛傍小堂沈沈不放出簾香却從寂寞生詩思漸近  
清明見海棠酒盞固難離客子錫簫還自憶江鄉地爐撤後  
羊裘解坐覺牆西日影長

寄題石遺皆山樓

卷簾是處是青山目力曾無片晌閒何用四時將竹轎居然  
萬綠滿柴關我疑清福歸前定天許先生隱此間一事最饒  
人健羨看山兼看鳥飛還

題林亭圖

七閩濱海成殊方吾祖實若開洪荒殿中君更負絕藝追逐  
虞褚名中唐蘭亭繭紙入祕府弓劍同付昭陵藏殿君書脉  
紹智永豐妍婉約追二王宣和收攬竭海內牆帙林軸生奇  
光金源鐵馬沸汴水秘笈乃逐腥風颺此帖若有神鬼護片  
紙乃未螽蟬傷香墨揭本已難得况復真本披琳瑯徐君好  
古世所罕構亭置石留江鄉當時此石屬江氏今刻或者還  
維揚裔孫再拜展遺墨緬懷祖德神徬徨圖亭紙上未云遂  
刻石願附林亭旁

遣懷

甚處桃源足避秦一時海內徧囂塵天心早分開棋劫醒眼  
偏教溷醉人藝苑聲名身外賤家庭滋味難餘真那知焦慮

陶心後猶夢花前岸角巾

叔節先生善余前後共事學校八年矣廼三年之中三  
更鉅變顧叔節有田而不能耕余無一椽之庇况乃  
田耶作此調叔節並以自調

天下爭傳姚氏學八年聚首向長安文名盛極身何補世難  
嘗深膽共寒永日戀田偏在客經時修史未成官較量終勝  
閩南叟江上無家把釣難

感事一首再寄姚叔節

四海腥風沸虎狼那能奢望及耕桑黨人本不談廉耻藩鎮  
居然定紀綱仍有雄渠窺蜀道豈真天意熱崑崗災消穰至  
知何日君我寧非燕處堂

五月十三日紀事

袞袞諸公念 大清平明龍燄耀神京爭憑忠愛甦 皇祚  
立見森嚴列禁兵天許微臣爲父老生無妄想到簪纓却饒  
一事堪圖畫再盼朝車趣鳳城

閱報有感

儀同端首各分官起廢除新印再刊孤注一拚博盧雉大家  
共夢入邯鄲據鞍忍效杜荀鶴賃廡仍成梁伯鸞日夜神靈  
盼 高廟莫教烽燧近長安

述懷

吾生一鈍奴目瞶髣髴蒼但識恩主人初不知炎涼盛時百  
花開簫管鳴高堂衰時風雨哀遺構委路旁車馬過無人高

柳披銀牆奴也尙依依曝背蹲虛廊寧復醜貧窮飢腸甘糝糠一旦聞鳴騶燦燦皆駿良叩關呼主人黃金盈佩囊孤注迷一擲飲博期千場轍魚惜枯鱗戰馬思舊創蠹木天假年再移根已傷傷根卽傷心感涕摧衷腸願捧杜陵血醴泉飲鳳凰

獨坐讀杜詩

身世原非杜拾遺淒涼偏讀拾遺詩許身稷卨終何濟滿目瘡痍儘可悲杜宇巢空誰與哺彭衙道險我安之

時避亂者多出城予

未行迷離一夢匆匆醒髣髴重開紫極時

送道郁

憶昔我避兵爾態何舒適呼車駐深巷趣我檢載籍西開樓

五楹柴門涵水色倚窗理針線米鹽自區畫今年再避兵洸  
瀾不如昔意似憐我老雙髻已垂白我自戀積書聊且守故  
宅寄食久依我况有貧窶戚我晨親晝幃晚亦事迢譯得錢  
市薪米爲若兒女力定武言尊王心本異謀逆建威不嗜殺  
念念在蒼赤雖處圍城中鎮靜若磐石亂定不經月爾且安  
眠食

五君詠

張淵靜勞無功胡瘦堂溫毅夫李梅庵皆余友也有  
詔徵之未至而諸鎮兵已臨城矣

淵靜稱鯁亮臨老卸疆寄避難隱涑水食貧甘鹽豉項城起  
無功死抱故君義作書詆共和攻者不爲地二子持峭行弗

奪平生志淵靜幸數見義憤累攘臂詔徵溫胡李璽書同日  
賁瘦堂隱廬阜朝夕鑒山翠去年吾謁陵毅夫適南至命  
寫拜鵲圖言中已見意潛樓與大政極力務羅致搜獵及梅  
庵敦趣易道帔讀詔頗驚歎引權豈寒細淵靜甫治任烽烟  
已如沸鄱陽湖水遙庾嶺雲容遲溫胡定一笑再衣吾荷芰  
獨幸勞無功竟爾周南滯其中詎有天完此瑚璉器吾測李  
道士江樓方取醉賣字日得錢萬事且決棄等我隱畫師安  
足膺重畀成此五君詠觸忌甯所畏

訛傳江杏邨侍御削髮爲僧感賦一詩

杜陵天寶亂寄跡贊公房何若披緇去茫茫奚所望肝腸無  
地熱花竹有餘芳定卜經聲裏含凄薦景皇



五月廿四日晨起聞巨礮聲知外兵攻天壇矣天壇定  
武軍所屯處鏖戰自卯至未五時始略息而東華門  
及煤山亦同時舉礮市上聞兵車轆轤聲寂無行人  
飛彈過余屋頂其聲蚩然余凄然懸懸於宮中因拉  
雜成此長句

夜色模糊天欲曙窓戶震震礮聲舉夢中已辨定武軍果以  
孤豚齏乳虎祈年殿外千歲柏森嚴扃鐃若禁鑰三千健卒  
竟入居礪酒割鮮置竈釜外兵踟躕起深黑潛若狴狴撲窩  
鼠雉堞列礮盡內向主兵上仰客則俯御碑壇樹半濺血呼  
聲動天過項羽連環如聽鴛鴦銃巨彈錯綜間三五是日奇  
酷汗氣蒸遙想血花噴紅雨南河火熱東華門朝車當日攢

文武六年讓政久相安奪門失計危  
冲主人心囂動萬卒  
叫區區乃用千夫禦煤山置礮亦何濟  
流彈入宮過伏弩羣  
奄奔走衛三宮  
少帝倉皇籲  
列祖我處圍城屹無動  
祈天願勿驚鐘簾爲君爲國漫不計  
但覺眼鼻自酸楚此軍  
再挫清再亡敢望中興作杜甫

王碧栖先一日馳書趣予出城言不行且悔余謂義不  
當行午後事定作此寄碧栖

不審吾何意遲遲戀國門  
早經聞戰訊果爾踐君言  
地震礮聲驟塵昏  
突騎奔池魚幸無事  
啜茗坐楹軒

津門晤張小帆中丞感賦

蒼黃無淚洒金銅  
淵靜齋頭拜寓公  
小別三年疑隔世  
破空

一語問移宮寒潭雪近難爲浪高頂雲孤不任風且幸蒲輪  
遲上道天留餘地待孤忠

寄葵霜

信君終始如程濟老我畸零類謝翱同戀餘明對殘月不知  
苦語近離騷剖心還媿酬恩薄毓德常疑責地高淒惻那堪  
談往事西清悵望首重搔

可嘆

非分秉大權往往發奇想矧乃自除吏驕狎因傲上乘亂愈  
得閒洸洸日張王開府等分藩坐擁十萬仗歛奸類玄默矯  
退恣欺誑天心開機槩朝局敗死黨童昏專黜陟薄海失宗  
仰聚兵伏江介鬼氣噓魍魎左右從所可影和雜慨慷反側

收兩利大勢據握掌蟾蜍沸議郎貔虎奮列將遂興淮徐甲  
輦道滿行帳歃血受私盟奪門覲上賞愁雲黯鳳闕兵氣生  
馬廠說然仍無與牋牒語恹恍京輦局再翻南面姑三讓既  
收漁人利麤才笑操莽翟讓處肘腋那復縱牙吻殺讓患非  
義縱敵差自強衡湘疥癬患潢池豈狂攘和戰日呶嘒貌仁  
語則妄懷光討朱泚聞畔豈惆悵逐帥陰所使藉以撤礙障  
楚氛日以惡割據語無狀揆席甯虛惡病叟且入相集議申  
天討神兵運意匠愬武與古通久已氣凋喪旣無隲度方恐  
有倒戈鄉驚魂甫守舍轉瞬覲亂象傷時淚眼竭閉戶徒感  
愴

憶昔

憶昔廣德初河北置節度田李均椎埋奏留出僕固是歲分  
諸州魏博暨澤潞太阿始倒持兵柄各竊據平盧竟逐帥賜  
名獲異數疆臣膽益恣動卽奮武怒山東最號闕牙兵成宿  
蠹弘正偶入朝微復識當宁悠悠五十載怪若鷹在笱脫令  
柄政要哮噬寧可禦動必如今日侈然竟臨御自饒一姓樂  
豈恤四海詛那知挑衆謹救亂手莫措若聞劉黑闥鉏菜作  
酸語

### 貪兵

悍卒可拊馴貪兵難處置狼嫌豈易實一噬靡不至朔方富  
健兒能步亦勝騎撫馭果獲當劣馬或就轡南土徵項城符  
璽待面致忽虞墜樊網悚若魚畏餌規避旣無方破空出奇

智縱兵掠京輦留身爲之備狙譎安可馴舉軍競冒利肆劫  
刑莫及投械事若戲大將卽棄軍身不面獄吏堂堂荆楚師  
討叛標漢幟不戰自崩角糧仗盡決棄鐫詰旣苟免昵若驕  
寵嬖潰集成自如安能奮鬪志潮汕已破裂吳鄂咸坐視奪  
便但自私堅對或恐臺宰相隱巾幘尤難語敵愾感愴尙何  
言但有委天意

諸將

均勢无弗爭同利惡相長等閒據大寶諸鎮已怏怏滇桂本  
幽陋莫阨天下吭得蜀方張王平楚始敖盪瀘敍旣見挫卷  
甲已渝向蜀江割天險意在蹶上將全蜀方仇滇蹈利毋乃  
妄所幸范王軍棄楚徑遜讓窺鄂必收岳盡銳方北嚮吳帥

麾羽扇開壁納袂黨截江止援師荆襄聽擾攘連和豈厭兵  
玩國若股掌縱敵圖自便頗蓄擁戴想陸氏豈人下氣已吞  
兩廣石勒欺彭祖僞謙日扇獎得閒卽兼并恐不留尺壤徒  
渙北人心坐受南軍誑燕齊合豫皖相持作鷸蚌戰士巢車  
行和議國門榜是非莫適從萬聲詆樞相安解當軸意半壁  
撤屏障劃淮互相帝彼此咸釋仗肘腋未穩貼詎卽安七咤  
詔今日反汗上慢激下抗內患生腹心惆悵我安往

十月廿一日六謁 崇陵禮成誌哀

匆匆六度 西陵哭五夜衣冠起踐冰入望御碑空有淚經  
時殿樹漸成陰天高難問滄桑局事去寧灰犬馬心淒絕胡  
僧仍梵唱臨風忍聽海潮音

恭題黃忠端獄中所作楷書長卷

九死還疑未報恩，忠魂仍盼轉乾坤。恨聲空咽清漳水，遺墨

長留碧血痕。隆武不終原氣數，遼陽何物卻生存。

洪遼陽與公同里

甲申壬午三年耳，忍聽啣悲出國門。

公於崇禎壬午二月九日領戌出辰陽後年卽

申甲

題劉葱石參議彙刻傳奇

雙雷閣上檢陳篇，逐一都宜付管絃。搢得無窮天寶淚，江南

不遇李龜年。

傳奇叢刻本奇觀，未得承平寶筏看。聞說宮中簫譜盡，空留

供奉跳靈官。

校書微撤繡工夫，面面紅窗柳萬株。絕代暖紅偏未寫，當年



但作枕雷圖

暖紅參議夫  
人軒名也

四圍山色謁

陵歸車上傾談對落暉秘笈琳瑯商贈我端

宜珍重作龍威

### 題顧端文領解墨卷

東林崔魏不兩立天啓亂乃逾萬曆叔時存之皆人豪千秋  
正氣歸無錫端文逝去遺墨存後昆寶乃逾拱璧尙書經義  
聲琅琅黜孔宗蔡出心得龜山適傳豈易覲精神貫此數行  
墨吾鄉文簡亦健者力忤權璫被羅織廷對策歸小蘇齋淋  
漓照眼墨花濕匹此真成玉合子我欲臨摹鐫以石東林講  
學豈立黨何爲抨擊無虛日忠憲沈冤從屈平天相端文脫  
斧質楊左前驅周雷繼盜憎主人盡死力果知毒蝮竟至此

福唐一書早秘惜雖然于玉立黃正亦好事坐使兆魁作口實  
端文心終揭日月光明豈爲風霾黑復社再興君子盡緬想  
前徽私歎泣

追憶

漸台未敗燄恢張竟有徵書到草堂不許杜微甘寂寞似云  
謝朓善文章脅汗謬託憐才意卻聘陰懷覓死方僥倖未蒙  
投閣辱苟全性命賴穹蒼

哭江杏邨侍御二首

直諫何曾媿昔賢偏當危局放歸田早知破碎難爲國自咽  
酸辛敢問天廻首翰林官舍在公由臺歸院傷心觀德殿門前崇陵

率移觀德殿紆以布衣入臨與公泣於殿門之外

可憐四世三公語竟驗君歸後數年

咽理吞言總失真先生到死是完人一心豈願歸骸骨七疏  
眞能動鬼神旣毀倫常憑作賊幸存松菊足娛親梅陽高隱  
圖應在端恐溪山慘不春

張魏公三省堂研歌爲馬通伯作

風磨雨濯不成紫何人割此黑龍尾云自魏公三省堂伴公  
揮灑澄心紙當時草檄討苗傳淚痕迸入研池水相隨揆席  
更貶所寶如斷壁供裴几是時玉帶生未胎公早昂藏思國  
恥殺端所失誤王庶構趙不應聽呂社公之精神如玉石奈  
何自玷留癥痕吾友桐城文章伯近年買自長安市錯綜五  
篆星聚奎凋光發炯生研底先生用此助纂著勤若南安注  
老子傳紀羅文玉局蘇史修靈璧襄陽米我囊銅劍不敢出

生平從未讓人美

戊午正月沈崑三招同樊樊山冒鶴亭羅瘦公王碧栖  
梁衆異黃秋岳李石龕集其寓齋聽陳君胡琴張君  
法曲時賈郎梅郎姚郎程郎均與席梅郎亦度曲二  
閱明日讀樊山詞而瘦公並以詩來趣和作此答之  
一曲燈屏集衆仙玉盆梨几早梅鮮居然四座生奇暖難得  
諸郎正妙年華髮深慚銀燭影兵塵甯近綺筵前風懷何似  
樊山老明日新詞上錦箋

題明湖小隱圖

東風吹恨上藤花流水柴扉遺老家時有濟南名士集情懷  
總不似乾嘉

疎葦搖涼月滿汀明湖柳色似西泠至今歷下亭如昨身世  
偏非王阮亭

吾鄉十研隱閩南亦有藤花半畝庵竟與詩人同樣本畫樓  
斜日柳蓼蓼

諧趣秋陰圖

內宴傳呼供奉班歌台斜面玉泉山匆匆記得渾脫晉陀舞弟  
子於今匪盛顏

雙垂紫袖列昭儀日午東朝出殿遲新帕御牀龍袞侍天顏  
憔悴有誰知

徵歌恆在德和園勸善金科張文敏所定譜久不存御輦無聲秋草

合西風徹夜霽清軒

秋柳蕭疎傍岸斜一泓御水長蘆芽八年玉笛收聲久舊譜

何從問月華

此指莊恪親王爲鼎峙春秋及忠孝璇圖也

戊午十月廿一日 景廟忌辰紆於十九日至涑水約

毓廉同謁 崇陵宿其寓齋卽席賦贈

心嚮葵霜小閣前先來涑水訪詩禪

毓之別號

驢鞍趣縣剛三里

龍馭賓天過九年語到無聊唯對燭事難逆料却憑天明

朝梁格莊頭路一望觚稜一惘然

廿日同毓清臣至梁格莊居梁髯之種樹廬時髯病未

能興也劉葱石參議繼至賦呈二公

歲歲朝 陵住此中舊時日影射窗紅 翠華莫蒞長年靜

黃葉無情是處風觸目飢寒憫陵戶回頭衰病念髯公此來

畏廬詩存

卷上

三十八

共搢遺民淚三子甯云道不同

梁髯構別業於種樹廬後之山麓意將家焉余登眺久之卽題其壁

乾坤納納此菟裘攝取龜山一半秋

門側對龜山

無盡碧中辨陵

樹不多紅處出明樓

隆恩殿之樓曰明樓

豈關勝概安書劍果得同心

定唱酬拊徧楹軒淒戀久祝公宿疾早時瘳

廿一日四鼓至陵下禮成誌悲于是紆凡七謁矣

山史天生哭攢宮千秋藍本偶然同一泓野水過羸馬半夜

朝房禮上公

時主祭者爲奉恩護國公  
誠昭字星階人至謙謹

月黯却看鷗尾迴殿

深微辨燭光紅丹墀風緊霜威重萬種悲含九頓中

戊午除夕

皇帝御書有秩斯祐春條賜舉人臣紆記恩一首

螺江太保鳴騶至手捧 天章降華門耀眼乍驚新 御墨  
拊心隱觸舊巢痕一身何補 皇家事九死能忘 故主恩  
泥首庭階和淚拜廻環恪誦示兒孫

己未元夕爲兒輩畫燈作蒼霞舊隱圖

卅年舊夢此留痕病婦從余住水軒潮落偶然逢紫蟹竹深  
容易入黃昏此身豈卜長爲客老母當時正抱孫一水一山  
無恙在眼中處處長情根

哭高子益四首

質器高寒迴出塵卅年投契識君真佯歡似構難言隱蹉遇  
寧非宿世因從此散場無箇事那知同命有姬人

君姬孫氏  
聞變雉經



舌出矣遇  
救得免

留將孝友精誠在已是金剛不壞身

焚香掃地日敲棋官罷私居稍展眉愛弟書來無盡語病軀  
生悟不多時營巢甫遂偏難隱謀國何方祇自悲昨夜夢中  
嗚咽醒挑燈起草哭君詩

當時持節使歐西草草離筵君子齋

余餞君於畿輔先  
哲祠君子齋中

逆測

歸期疑死別痛箴狂病發悲啼

君把余痛哭戒勿任  
氣至今思之心碎矣

寸心只

有君能諒老福何爲命不齊檢取六年前小影蠅頭細細尙

留題

都門逐歲祀梧州兩度招邀拜寓樓我代故人作生日君含  
酸淚溯前遊衰宗昆季誰中壽同輩年華亦暮秋回首鑄龍  
堂舊事不堪潮上到心頭